

之前重谷之裡百鳥不宿神獸亦避雖至人亦蔑有  
入也越此百里西下陰壑復關峻岳則金屋龍棟控  
亢聳搏異花雜乎瓊瑤僊風冷乎清綽靈芝馥乎滿  
郊麒麟馴乎盈郭龍蹇屈於平池鳳翮聯於長漠此  
則上帝之秘區而太白之關鑰也其東百里瑤宮藍  
殿萬戶齊啓蒼光青氛四回周起函丹書於億笈紛  
朱絃於兆徵散靈繭之如斗歷綺轂之奇靡總百綵  
而具存奚瓊桃之如累此又太乙之宅合陽之宮至  
其南也朱雲陸離丹閣霽霽神桂宿日南極奉塵羽  
翰極乎麗暉珠貝極乎雕飾鵬鸚駕而鳳軒鯨鯢御

而兕履是謂朱明之宮天帝之闕北則至幽號曰方  
府紫微之所宿萬象之所聚玉臺瑩光冰柱炫色珊  
瑚如林水晶四徹雲沆瀣而守默氣鬱森而馳起靈  
龜玄龍參錯其下松檜接乎帝閣金碧曳乎泉石翼  
八獸以守衢役百神而司臬夫皆五天之至精萬化  
之樞紐能有至者皆必具靈負秘與抱圖膺錄之士  
有天人德者也已而風柔香墜路豁視空若雙龍  
之負引倏靈宇之就中僊姝麗乎兩間洞簫錯乎萬  
笙皓歌凝乎飛泉朱絃颯乎翠空座列煥乎雲端境  
象委乎穹橢環珮鏘乎旖旎禮數儀乎動容予乃攝